

Ini Sa Igsulat I MALAKIYAS

Ini Denu Sa Igsulat I Malakiyas

Si Malakiyas sa tegesugkow kagi i Nemula. Egoh i Sakaliyas migsabuh egsugkow sa kagi i Nemula, lima pulù gepalay pa sa egoh i Malakiyas nekesambì. Egoh iya, nesakup pelawà sa kedatuan sa datù tegePélsiya sa tanà Huda, dodoo melanih doo sa keugpà da diyà sa tanà Huda.

Egoh i Malakiyas migsugkow sa kagi i Nemula, egpauk sa medoo Hudiyu owoy endà egpangunutan da duu sa mepion adat kesimbà. Endà ma egpangunutan da duu sa medoo uledin i Nemula. Huenan di, inindaw i Malakiyas kagda anì mesenulê da owoy pelikù da ma diyà si Datù Nemula, sa Nemula épê dakel kehidu owoy anan metudà sa egbaelan di. Basa ko Isdela kansad 10 owoy Nihimiyas kansad 13 denu sa binaelan sa medoo Hudiyu egoh da migdineg sa kagi i Nemula igsugkow i Malakiyas.

1 1Na, ini sa kagi i Datù Nemula igsugkow i Malakiyas diyà sa medoo tegeIslaél.

Ini Denu Sa Kehidu I Nemula Diyà Sa Medoo TegeIslaél

2Na, mig-ikagi Nemula i diyà sa medoo etaw di, guwaen di, “Tapay dé eghiduwan ku kiyu edung egoh anay.”

Dodoo migsagbì da, guwaen da, “Enù sa ukit kehidu ko kenami?”

Migsagbì Nemula i, guwaen di, “Taa yu si Isaw owoy si Hakob, telahadi da. Eghiduwan ku Hakob i owoy sa medoo tugod di, 3dodoo egkelepuhan

ku atung Isaw i owoy sa medoo tugod di owoy pinedaetan ku sa medoo getan diyà sa tanà di. Binaluy ku melabel tanà mediyù dalesan sa tanà di, owoy pinandayà ku sa medoo uled tanà anì umugpà da dahiya.”

4Na, amuk mikagi sa medoo tugod i Isaw tegeIdom, guwaen da, “Apiya di pa nedaetan sa medoo menuwa ké, baelan ké doo dulì.”

Dodoo ini sa sagbì i Datù Nemula, guwaen di, “Apiya baelan yu dulì, lukaten ku mendaa taman sa egoh di pengadanan sa medoo liyu etaw Medaet Menuwa iya wé kenà yu, owoy pengadanan da ma

Menuwa Egkelanggetan i Nemula Taman Melugay.”

5O medoo tegeIslaél, amuk hauwen yu ini i, mikagi yu, guwaen yu, “Épê dakel egkegaga Datù Nemula i, apiya diyà sa liyu tanà beken diyà siini tanà Islaél daa.”

**Ini Sa Egoh I Nemula
Migsigbolow Diyà Sa
Medoo Tegesimbà**

6Na, mig-ikagi Datù Nemula i épê dakel egkegaga diyà sa medoo tegesimbà, guwaen di, “Taa yu sa anak, eg-adatan di sa emà di. Owoy hediya ma sa udipen, eg-adatan di ma sa datù di. Dodoo aken i emà yu, maen di ya endà eg-adatan yu duu aken? Owoy aken ma sa datù yu, dodoo endà egpangunutan yu duu aken. Egtabiyaen yu aken, dodoo tapay yu doo umigsà, guwaen yu, ‘Enù sa ukit ké egtabiyà keniko?’

7“Iya sa ukit ketabiyà yu kenak sa kebegay yu sa tètê kaenen diyà sa atung kenà yu eg-ulow sa igbegay yu diyà kenak.

“Agulé umigsà yu doo tapay, guwaen yu, ‘Ngadan sa ukit ké endà eg-adat diyà keniko?’

“Endà eg-adat yu diyà kenak danà yu migtabiyà sa atung kenà yu eg-ulow sa igbegay yu diyà kenak. 8Enù di ya, pinenemdem yu pa amuk enget sa binaelan yu egoh yu mig-uwit sa hinagtay langap anì

ibegay yu diyà kenak? Enù di ya, pinenemdem yu pa amuk enget sa binaelan yu egoh yu egbegay sa lepù hinagtay owoy sa eglinadu? Tukaw yu begayi diyà sa ulu-ulu yu sa éhê iya wé. Hauwen ta i amuk metuuwan diyà keniyu owoy amuk tabangan di kiyu. Aken si Datù Nemula eg-ikagi ini i.

9“Hediya ma kiyu i medoo tegesimbà, tukaw yu pegeni diyà si Nemula sa kehidu di diyà keniyu. Dodoo endà sagipaen ku duu sa kesimbà yu danà yu mig-amu egbegay diyà kenak. Aken si Datù Nemula sa eg-ikagi ini i.

10“Iya sa ungayà ku pintuan yu dé sa medoo bengawan sa Dalesan i Nemula, anì endà dé taguan yu duu apuy sa atung kenà yu eg-ulow enù ka endà dé duen ulan di diyà sa kehaa ku. Endà egketuuwan a diyà keniyu, owoy endà ma sakemen ku duu sa medoo ibegay yu. Aken si Datù Nemula épê dakel egkegaga sa eg-ikagi ini i. 11Apiya sa medoo etaw diyà sa langun balangan tanà diyà siini sinukub langit, eg-adatan da doo sa ngadan ku edung magtu simag taman sumigep. Owoy muni dé kenà sa menuwa diyà siini uwang tanà, eg-ulow da sa lana mepion ngadeg owoy egbegay da ma sa mepion diyà sa kehaa ku, enù ka eg-adatan da sa mapulù ngadan ku. Aken

si Datù Nemula sa eg-ikagi ini i.

12“Dodoo kiyu, endà eg-adatan yu duu aken danà yu eg-ikagi endà duen ulan sa atung kenà yu eg-ulow owoy danà yu ma egbegay sa medoo kaenen endà mepion di diyà sa kehaa ku. 13Owoy eg-ikagi yu ma, guwaen yu, ‘Egtepal ké dé egbael ini i,’ owoy egkelepuhan yu ma sa uledin ku. Egbegayan yu aken sa medoo hinagtay pinenakaw yu ataw ka lepù ataw ka sa eglinadu. Enù di ya, iya sa penemdem yu sakemen ku iya wé? Aken si Datù Nemula sa eg-ikagi ini i.

14“Mepigtamayan ku sa etaw tegelipul enù ka igpasad di ibegay sa mepion hinagtay di diyà kenak, dodoo iya polo sa igbegay di diyà kenak sa medaet. Na, sebaen ku daa sa Datù épê dakel egkegaga owoy melimedangan diyà kenak sa langun etaw diyà sa medoo balangan tanà. Aken si Datù Nemula épê dakel egkegaga sa eg-ikagi ini i.”

Ini Sa Sasà I Nemula Diyà Sa Medoo Tegesimbà

2 1Agulé mig-ikagi Datù Nemula i épê dakel egkegaga, guwaen di, “Na, duen sa isugù ku diyà keniya, kiyu i medoo tegesimbà. 2Taa yu, hih. Mepion amuk tigtu adatan yu aken. Dodoo amuk endà duminegdineg yu diyà kenak,

owoy amuk endà adatan yu duu aken, tubaden ku kiyu. Tubaden ku ma sa medoo mepion nekuwa yu danà di kiyu sa tegesimbà. Taa yu, tinubad ku dé iya wé enù ka endà migpangunut yu diyà sa igsugù ku. 3Indawen ku sa medoo tugod yu owoy idulét ku diyà sa palas yu sa légét sa medoo hinagtay ibegay yu diyà kenak, owoy ipeunut ku ma kiyu diyà iya wé ibuung ku. 4Amuk hediya, metiigan yu doo kedu diyà kenak siini sasà anì tapay doo meeles sa nesepasadan ké sa medoo tegesimbà tugod i Lebi. Aken si Datù Nemula épê dakel egkegaga sa eg-ikagi ini i.

5“Nesepasadan ké sa medoo tugod i Lebi anì kumelalù da owoy anì kumelanih ma sa pedu da. Iya sa igbegay ku diyà kenagda anì adatan da aken. Tuu ma doo, eg-adatan da aken owoy egkelimedangan da ma diyà kenak. 6Igtulù da diyà sa medoo etaw sa tuu kagi dinineg da diyà kenak. Endà egbutbut da owoy endà eglipul da, dodoo egbaelan da polo sa mepion diyà sa kehaa ku owoy eg-ilingan da ma sa metudà adat, owoy medoo ma sa egtuluen da anì sumabuh da mael medaet.

7“Na, iya sa galebek sa medoo tegesimbà sa ketulù da sa tuu keketiig denu si Nemula. Mepion amuk mangay sa medoo etaw umigsà diyà kenagda denu

sa ungayà i Nemula, enù ka kagda sa tegetulon sinugù i Datù Nemula épê dakel egkegaga. ⁸Dodoo kiyu i medoo tegesimbà, migsekê yu polo diyà sa tuu ketulù, enù ka danà sa ketulù yu, neenggat sa medoo etaw anì mael da salà. Tinipay yu sa nesesasadan ké sa medoo tugod i Lebi. ⁹Huenan di, pemaenen ku sa kekelepuh sa medoo tegeIslaél keniyu owoy pemalaen ku kiyu diyà sa kehaa da, enù ka endà pinangunutan yu duu sa ungayà ku owoy endà ma nesetepeng sa ukít ketulù yu sa uledin ku.”

**Ini Sa Egoh Sa Medoo
TegeIslaél Endà Egpetuu Sa
Igpasad Da**

¹⁰Enù di ya, netiigan yu pa sebaen daa sa Emà ta? Enù di ya, sebaen daa sa Nemula migbael kenita? Amuk hediyà, maen di ya endà ipetuu sa uman sebaen etaw diyà kenita sa igpasad ta diyà sa duma ta? Danà iya wé egbaelan ta, tinipay ta sa nesesasadan da i Nemula sa medoo tupù ta egoh anay. ¹¹Apiya dutu Islaél dō owoy diyà tanà Huda owoy menuwa HéIusalém, tinipay sa medoo etaw sa nesesasadan da si Nemula enù ka binaelan da sa tigtu medaet diyà sa kehaa di. Tinétê da sa dalesan tigtu

egkedakelan pedu i Nemula danà sa medoo maama migsawa sa medoo bayi egsembà diyà sa beken tigtu nemula.^a ¹²Mepion amuk mepigtamayan i Nemula sumalà dé sa etaw egbael iya wé anì mekedan diyà siini tanà ta, apiya di pa eg-uwiten di sa igbegay di uloy diyà si Datù Nemula épê dakel egkegaga.

¹³Ini ma sa egbaelan yu. Egtemù yu eg sinegaw diyà sa atung kenà yu eg-ulow sa igbegay yu diyà si Nemula owoy egpehiduhidu yu ma, enù ka endà dé egketuuwan di diyà sa medoo igbegay yu diyà kenagdi owoy endà ma dé egsakemen di duu. ¹⁴Eg-igsà yu ngadan sa maen di endà egsagipaen di kiyu. Ini sa pesuwan di, netiigan di endà ipetuu yu duu sa igpasad yu diyà sa bayi sinawa yu egoh yu batàbatà pelà. Migpasad yu diyà si Nemula sa egoh yu mael mepion diyà sa sawa yu, dodoo endà ipetuu yu duu, apiya di pa igpetuu di sa hagdi igpasad. ¹⁵Beken sinesebaen i Nemula atu kiyu sa lawa yu owoy sa suguy yu ma? Enù ka iya sa ungayà di umanak yu anì mangunut da ma diyà kenagdi. Huenan di, tuliki ko sa pedu ko anì endà tipayen ko duu sa igpasad ko diyà sa bayi sinawa ko egoh yu batàbatà pelà.

^a 2:11 Mebaluy ma guwaen di, “danà da egpenemula sa medoo beken tigtu nemula.”

16Mig-ikagi Datù Nemula i sa egpigtuuwen sa medoo tegeIslaél, guwaen di, “Egkelepuhan ku sa keseekeday yu, owoy endà ma meiyap a amuk baelan sa maama sa medaet diyà sa sawa di. Huenan di, tulik ka anì endà metipay ko duu sa igpasad ko diyà sa sawa ko.”

17Na, egtepal dé Datù Nemula i danà sa medoo eg-ikagiyen yu.

Dodoo eg-igsà yu, guwaen yu, “Ngadan sa ukit ké egtepalan i Nemula?”

Iya sa ukit yu egtepalan i Nemula sa keikagi yu, guwaen yu, “Mepion doo diyà sa kehaa i Nemula sa etaw egbael medaet, owoy egketuuwan ma doo diyà kenagda.” Owoy egpetepalen yu ma kagdi danà yu eg-igsà, guwaen yu, “Kenà i Nemula i dé épê metudà adat?”

Medapag Dé Sa Agdaw I Nemula Lumigela Sa Langun Etaw

3 1Agulé mig-ikagi Datù Nemula i épê dakel egkegaga, guwaen di, “Haa yu, duen sa egsugùsuguen ku pehunawen ku anì tapayen di sa dalan ukitan ku. Agulé sa Datù eg-angat-angatan yu, petow dé tumebow diyà sa Dalesan i Nemula. Tigtu meketuu mangay dini sa egsugùsuguen ku sa eg-angat-angatan yu anì tulonen di sa kagi ku nekepasad.”

2Dodoo enday ta duu sa etaw meketigkel sa gai sa ketebow di. Owoy enday ta duu sa meketaeng amuk pehaa dé. Enù ka kagdi sa lagà apuy igtunag putow amuk tuu putow, owoy lagà ma sa tigtu mepion sabun mekekedan lued. 3Umangay dahini anì antangen di sa medoo tegesimbà, lagà sa etaw egtapis sa pilak owoy bulawan diyà apuy. Amuk hediya, mebaluy da dé megay diyà si Datù Nemula sa medoo tigtu mepion diyà sa kehaa di. 4Agulé metuuwan dema Datù Nemula i diyà sa uwiten sa medoo tegeHuda owoy tegeHélusalém sa ibegay da uloy diyà kenagdi lagà mendaa sa egoh anay.

5Agulé mig-ikagi Datù Nemula i épê dakel egkegaga, guwaen di, “Medapag a dé mangay diyà keniyu anì antangen ku. Owoy petuuwen ku mapes sa salà sa medoo épê lambus owoy sa medoo tegebigà owoy sa medoo tegebutbut owoy sa medoo tegelugi sa eggalebek diyà kenagda, owoy sa medoo tegepelihay sa bayi balu owoy ilu, owoy sa medoo endà metudà eg-antang sa beken tigtu etaw diyà sa menuwa da, owoy sa medoo endà melimedang diyà kenak.”

Ini Denu Sa Kebegay Baed Diyà Si Nemula

6Agulé guwaen i Nemula, “Aken si Datù Nemula owoy

endà mehalì a. Huenan di, kiyu i medoo tugod i Hakob, endà pelà mepigtamayan yu imet, 7apiya di pa egpelononon yu sa uledin ku owoy takà yu ma migtipay edung egoh sa medoo tupù yu. Dodoo amuk pelikù yu diyà kenak, kuwaen ku doo kiyu. Aken si Datù Nemula sa eg-ikagi ini i.

“Dodoo umigsà yu, guwaen yu, ‘Ngadan sa baelan ké anì mekepelikù ké diyà keniko?’ ”

8Agulé guwaen i Nemula, “Umigsà a ma, enù di ya metudà pa egbaelan sa etaw amuk lipulen di Nemula i? Endà metudà di, dodoo eglipulen yu doo aken.

“Dodoo umigsà yu dema, guwaen yu, ‘Ngadan sa ukít kelipul ké keniko?’

“Denu sa sepulù pelesintu owoy sa medoo liyu ibegay yu diyà kenak. 9Netubad yu langun, enù ka eglugiyen sa medoo etaw diyà sa langun menuwa yu aken. 10Uwit yu langun sa niyu ibegay sepulù pelesintu anì megulub sa kailangan diyà sa Dalesan i Nemula. Baeli yu tukaw ini i. Agulé hauwen yu doo ukaan ku sa medoo tatawan diyà langit, owoy buwahan ku diyà keniya sa mepion ketabang temù medoo. Aken si Datù Nemula épê dakel egkegaga sa eg-ikagi ini i. 11Endà ma pandayaen ku duu sa medoo uled tanà pedaet sa medoo hinemula yu, owoy

tigtu mebaluy ma kebunga sa medoo palas hinemula yu.

12Amuk hediya, umikagi sa medoo liyu etaw diyà sa langun balangan tanà, guwaen da binagian yu enù ka tigtu mepion kenà umugpà sa niyu tanà. Aken si Datù Nemula épê dakel egkegaga sa eg-ikagi ini i.”

Ini Denu Sa Kehidu Igpasad I Nemula

13Agulé guwaen i Datù Nemula, “Na, medaet sa inikagi yu denu kenak.”

“Dodoo eg-igsà yu, guwaen yu, ‘Ngadan sa medaet inikagi ké denu keniko?’ ”

14“Iya sa inikagi yu, guwaen yu, ‘Endà duen ulan sa kepigtuu ta diyà si Nemula. Ngadan sa ulan sa kepangunut ta diyà sa medoo igsugù di? Ngadan ma sa ulan sa kepehaa ta diyà si Nemula épê dakel egkegaga sa kekebukul ta danà sa medoo salà ta? 15Dodoo hinaa ta sa medoo etaw hambug, kagda polo sa binagian, owoy egkekawasà ma doo sa medoo tegebael medaet. Owoy apiya di pa egtepengan da Nemula i danà sa medaet kebael da, endà doo egkepigamayan da.’ ”

16Agulé egkeseolom sa medoo etaw épê kekelimedang diyà si Datù Nemula. Egoh i Nemula migdineg sa inikagi da, igpesulat di diyà sa sebaen libelu sa ngadan sa medoo etaw

épê kekelimedang diyà kenagdi owoy eg-adat kenagdi.

¹⁷Agulé mig-ikagi Datù Nemula i épê dakel egkegaga, guwaen di, “Mebaluy kagda sa etaw ku. Amuk meuma sa agdaw ku sumetipon sa medoo etaw eghiduwon ku, tigtu dé meetaw ku kagda. Ipaten ku kagda lagà sa kehidu sa maama sa anak di egpangnut diyà kenagdi. ¹⁸Amuk meuma iya wé, hauwen yu doo sa kenà di nesetigesa sa etaw metiengaw adat owoy sa tegebael medaet, owoy hediya ma, mesetigesa sa egpangnut diyà kenak owoy sa endà egpangnut.”

Ini Sa Agdaw Keligela I Nemula

4 ¹Na, mig-ikagi Datù Nemula i épê dakel egkegaga, guwaen di, “Taa yu, hih, meuma doo sa agdaw egoh sa medoo etaw hambug owoy sa medoo tegebael medaet meulow lagà sa legami ulowen. Amuk meuma iya wé agdaw, meulow da langun owoy endà duen mesamà diyà kenagda, apiya sebaen. ²Dodoo kiyu i medoo etaw épê kekelimedang diyà

kenak, mealukan yu polo danà sa tunung ku lagà sa teleséng agdaw enù ka kedanan di sa medoo linadu yu. Sumautsaut yu danà yu meanggan lagà sa nati sapì pinelaun diyà sa lugenan di. ³Amuk meuma sa agdaw ku kumukum, ipeuyayà ku keniyu sa medoo tegebael medaet, owoy mekeiling da daa sa kepung tanà sadsadan yu. Aken si Datù Nemula épê dakel egkegaga sa eg-ikagi ini i.

⁴“Na, petulengtuleng yu sa igtulù i Mosis sa egsuguen ku egoh di migsugkow sa medoo uledin owoy sa medoo sugù igbegay ku diyà kenagdi dutu siedò getan Holéb^b egoh anay anì pangunutan sa medoo tegelIslaél.

⁵“Taa yu, hih, peangayen ku diyà keniyu Iliyas i sa tegesugkow kagi ku egoh di endà pa tumbow sa agdaw i Datù Nemula, sa agdaw mekelimedang owoy mekegaip. ⁶Danà sa ketegudon di, meseunut sa pedu sa lukes owoy sa batà. Amuk endà meketuu iya wé, angayen ku pedaet sa uwang tanà yu.”

^b 4:4 Getan Sinay sa sebaen kepengadan sa getan Holéb.